



Ե Ր Կ Շ Ա Բ Ա Թ Ա Թ Ե Ր Թ

ՀՀ Դաշնակցության Արցախի Կենտրոնական Կոմիտեի պաշտոնաթերթ

Մենք համացանցում

www.aparaj.am



Արցախի ժողովրդի կոչ-ուղերձը համայն հայությանը եւ աշխարհին

Արցախի Հանրապետության մայրաքաղաք Ստեփանակերտի Վերածննդի հրապարակում հավաքված ժողովուրդն իր կոչն է ուղղում աշխարհասփյուռ հայությանը, համաշխարհային հանրությանը եւ ազատության ու համամարդկային արժեքների համար պայքարող յուրաքանչյուր անհատի

Դեկտեմբերի 12-ից սկսած Արցախը հայտնվել է լիակատար շրջափակման մեջ. ավելի քան 120 000 մարդ, այդ թվում՝ շուրջ 30 000 երեխաներ հայտնվել են ծանր կացության մեջ՝ իսպառ զրկված լինելով ազատ տեղաշարժի ու դրա հետ կապված բազմաթիվ կենսական հնարավորություններից: Հերթական անգամ Ադրբեջանի ռազմաքաղաքական ղեկավարությունը կոպտորեն խախտում է միջազգային իրավունքի նորմերը եւ 2020թ. նոյեմբերի 9-ի Եռակողմ հայտարարությամբ ստանձնած պարտավորությունները:

Արցախի եւ Հայաստանի միջեւ ցամաքային ճանապարհի անխափան գործարկումը չի կարող լինել որեւէ բանակցությունների եւ սակարկման առարկա: Արցախը արտաքին աշխարհին կապող հաղորդակցությունը պետք է առանց նախապայմանների ու անհապաղ վերականգնվի, եւ պայմաններ ստեղծվեն դրա հետագա անխափան գործունեությունն ապահովելու համար: Հայ ժողովրդի հանդեպ Ադրբեջանի կողմից իրականացվող էթնիկ զտումների եւ խտրական քաղաքականությունը, որը նոր թափ է ստացել 2020թ. աշնանը մեզ պարտադրված պատերազմից ու դրա թողած աղետաբեր հետեւանքներից հետո, նպատակ ունի հայաթափել հայկական Արցախը՝ շարունակելով 1915թ. Թուրքիայի կողմից Արեւմտյան Հայաստանում իրականացված ցեղասպանության բեմադիրը:

Իր պատմական հայրենիքում ազատ եւ անկախ ապրելու համաժողովրդական կամքն է 1988 թվա-

կանին հենց այս հրապարակից ուղղորդել մեր ժողովրդին ազատագրական պայքարի, որի արդյունքում մենք ունենք միջազգային իրավունքի նորմերին համապատասխան հռչակված ինքնիշխան պետություն եւ նրա կենսունակությունն ապացուցող քաղաքական, տնտեսական ու սոցիալական տեսանելի ձեռքբերումներ:

Այսօր, երբ վտանգված է համայն հայության երազանք Արցախի Հանրապետության լինելիությունը, մենք, խոնարհվելով մեր ազատագրական պայքարի ճանապարհին իրենց կյանքը նվիրաբերած հայորդիների հիշատակի առջեւ, վերանորոգում ենք մեր ուխտը՝ մեր սուրբ նահատակների գործը շարունակելու եւ մեր արժանապատվությունը պահպանելու համար:

Շարունակվող պայքարի ընթացքում մենք, ինչպես նախորդ տարիներին, այսօր էլ ունենք մայր Հայրենիքի եւ համայն հայության համակողմանի աջակցության կարիքը: Անցած տարիներին Արցախը եղել է հայկական ինքնության եւ արժանապատվության խորհրդանիշ:

Այսօր, երբ հայկական երկրորդ հանրապետությունը կանգնած է նոր մարտահրավերների առջեւ,

Արցախը պետք է դառնա այն առանցքը, որի շուրջ պետք է միավորել համազգային ներուժը: Արցախի Հանրապետության ապագան համազգային նշանակության հարց է եւ պահանջում է համահայկական համախմբում ու համերաշխություն:

Արցախի Հանրապետությունը շարունակելու է ջանքեր գործադրել իր ժողովրդի անվտանգությունն ու պաշտպանունակությունն ամրապնդելու համար՝ համադրելով սեփական կարողություններն ու Ռուսաստանի Դաշնության խաղաղապահ առաքելության հնարավորությունները:

Արցախի Հանրապետությունը՝ որպես միջազգային հիմնարար իրավունքների գերակայությամբ առաջնորդվող պետություն, շարունակելու է հավատարիմ մնալ համամարդկային արժեքներին եւ լինել կառուցողական: Ծավալապաշտական նկրտումներն ու տնտեսական շահերը չպիտի թելադրող լինեն ժամանակակից միջազգային հարաբերություններում: Արցախն աշխարհի քարտեզի վրա այն կետն է, որից, ինչպես 1988 թվականին, կարող է սկիզբ առնել 21-րդ դարի բարոյական աշխարհակարգի ձեւավորումը:


**ք. Ստեփանակերտ
25 դեկտեմբերի, 2022թ.**

Պետք է միավորվենք եւ կանգնեցնենք պարտությունների թափանիվը. Արթուր Մոսիյան



Մենք ժամանակին ասում էինք, որ պարտված իշխանությունը պետք է հեռանա, որ կարողանանք մեքենքս ուղղենք, դժբախտաբար Հայաստանում այդ շանքը չօգտագործեցին: Մենք պետք է միավորվենք, կանգնեցնենք պարտությունների թափանիվը եւ ուժ գտնենք այն հակառակ ուղղությամբ շարժելու համար:
Կարդացեք 4-րդ էջում

Ես այստեղից չեմ գնալու ու չեմ ենթարկվելու Ադրբեջանի պայմաններին. Ռուբեն Վարդանյան



Մեզ սպասվում է ծանր ճանապարհ: Այդ ճանապարհն անցնելու ենք միասին, ու դա պահանջելու է ծանր ու քրտնաջան աշխատանք: Բայց եթե մենք զգանք, որ իրար հավատում ենք, որ հավատում ենք մեր նպատակին՝ անկախ Արցախ ունենալուն ու մեր հողի վրա ապրելու իրավունքին, ամբողջ աշխարհն է հավատալու մեզ:
Կարդացեք 3-րդ էջում

